

《第一次 我說我會記得妳 第二次 我說我會約定妳》

作者: 映雪

Powered by [紙言](#)

序言

或許是真人真事

也許是時空交錯下的偶然

頓時人影錯雜 總是誤闖了別人的圈子

因為偶然 衍生愛情

偶然湊巧初相遇(上)

天朗氣清，惠風和暢，簡直為中三暑假，添了不少生氣！

差點忘記介紹自己。

我叫Dennis，將是一名商科生，過了暑假，就踏進高中。樣貌平平庸庸，戴眼鏡，身高約176cm，略帶一點毒，因為喜歡看動漫，閒時會打羽毛球。成績算是比上不足，比下有餘。雖然有點毒，但是口才還算挺好，牙尖嘴利，出口術無人能及。最喜歡開懷大笑，可以笑到著了魔，性格尚算樂觀。有一點很像女孩，特別喜歡吃甜食，尤其是蛋糕。

暑假天天補課真的悶透了，功課又已經做好，已經沒東西可做，唯有找些少事情消磨時間。本身自己的廚藝都不錯，基本上講得出就做到，煮餸煲湯，易如反掌。因為自以為是的心態作祟，所以就想嘗試去做蛋糕。我就找表姐幫手，表姐是蛋糕師傅，希望拜師學藝。

我：表姐，Dennis啊！

表姐：找我有事？表弟！

我：嗯嗯！我想學做蛋糕啊！

表姐：男人老狗學來做咩？

我：你知道我有多喜歡吃蛋糕啦！想吃就自然想整呢！

表姐：你想食，我可以做俾你，要人教，好麻煩啊！大佬，我要返工㗎！

我：嘩.....

表姐：好啦！好啦！講明先啊，我搵人幫手教你啦下，搵唔到唔好賴我啊！

我：好嘢！

三日後.....

我：表姐，係咪幫我搵到人啦？

表姐：可以咁講啦！我個Friend就唔得閒，佢堂妹就可以啊！

我：堂妹！幾歲啊？(冇誠意就咪教啦！)

表姐：同你一樣咁大囉！

我：咩料啊，搵個細路女嚟教我，好敷衍啫！（細路女教到咩出嚟咁巴閉！）

表姐：你咪又係細路一個，人地好叻㗎，整蛋糕好好食，又識寫食譜，我可能都唔及佢，佢仲可以改良西廚學院啲蛋糕啊！

我：係咪咁勁啊？

表姐：咁學定唔學？

我：學學學！

表姐：你好彩啦，人地差不多日日整蛋糕，唔駛你俾錢！

我：咁唔該晒啦，表姐！

表姐：過幾日帶你上去啦，警告你啊，唔好失禮我啊！同埋人地係女仔嚟，你唔好毛手毛腳啊！

我：係係係！

表姐：十一點，太古站等啦！

我：乜要過海㗎？

表姐：你將軍澳去太古好近啫！嫌三嫌四，麻鬼煩！

我：得得得！唔好意思啊！

終日可以擺脫沉悶的日子，人生有寄託了，還可以有味蕾上的享受，或者學藝有成後，超越表姐！我是處於最終幻想狀態！

與表姐會合後，我在沿途問個不停，不斷問，不斷問，表姐說：「夠啦！就到啦！」我馬上自動收聲！噓~噓~噓~噓~

堂姐：你地嚟㗎？入嚟坐啦！

表姐：真係打攞你啦！一日都係我表弟唔好啦，係咁話要整蛋糕！

堂姐：都唔算打攞！打攞既係我堂妹啫！（她面帶親切笑容！）

我：姐姐，打攞晒！（等我扮晒野先！）

表姐：（表弟，幾好戲吖！）

我：（表姐，彼此彼此啦！）

我環視這家裡的四周，陽光細細地從屋外滲透，加上有淡淡清香，感覺十分舒服。整間屋非常整潔，一塵不染，但潔淨得有點奇怪突兀，甚至像一個陌生無人的地方。

堂姐：哈哈，聽講你同我堂妹差唔多大，不如你都叫我堂姐啦！

我：好既！（依位姐姐都真係幾好人，又有禮貌，笑容可掬，不過咁耐都未見到佢堂妹嘅？）

表姐：你堂妹呢？

堂姐：啱啱去咗洗手廁梳洗啊！應該就出嚟！

我：梳洗？（啱啱先醒？）

堂姐：出嚟嚟！同你介紹吖！我堂妹Stephanie！

Stephanie：你哋好，頭先唔好意思，瞓晏咗！（她有禮地鞠躬，初見感覺很舒服！）

我：我叫Dennis，多多指教！（我被她的少許東西所吸引，呆滯咗兩秒.....）

堂姐：Stephanie，麻煩你教Dennis整蛋糕啦！唔該你啦！我係時候要走啦！

表姐：我都差唔多啦！

堂姐：我堂妹好易氹㗎！（她在我耳邊講！）

我：（點解咁講呢？）

表姐 & 堂姐：Bye！

究竟我被什麼吸引呢？沒錯，是Stephanie。因為本人實在很喜歡長腿。Stephanie身型很好，並不是玲瓏浮凸，是一種優雅的輕盈，潔白的皮膚，一把長髮，身穿藍色短裙。雖然面容有點憔悴，但水汪汪的眼睛、幼小的臥蠶卻抓住我的目光，在我眼中，彷彿看到她眼裡的故事，她真的很吸引。作為一個「美學大師」，我都忍不住看多兩眼！回神過來後，我感到些少不習慣，可能是孤男寡女吧！她亦有少許害羞，可能因為想做蛋糕的男孩的確少有。

Stephanie：Dennis，不如我哋開始啦！（她的聲線細聲溫柔！）

我：好啊！

Stephanie：聽堂姐講，你好似係初學，我哋今日整簡單啲先啦！

我：嗯嗯！

Stephanie：份量要精準，大約咁可以就準確啲。

我：係！(隨手落都咁準唔係呀嗎！)

Stephanie：同埋落麵粉要分散啲，因為可以溝埋啲！

我：係！

我站在Stephanie的身旁，她身上散發出陣陣葡萄香氣，我隱約地面紅起來，呼吸急速，所以做蛋糕顯然有些不專心！終於，我辛辛苦苦地將蛋糕推入烤爐。嘩！真是累透！做蛋糕與煮饊真是兩碼子的事情，未免太難吧！我真的不及她的耐性！我坐在沙發上，簡直不想起來。我雙眼又突然地朝向Stephanie的身軀了，原來她很高挑，應該有168cm，雙腿簡直.....唉！我真是變態！

Stephanie：得啦！嚟試下自己手勢吖！不過等我一陣！

我：好啊！

Stephanie：嘩！(她及時遞上一杯紅茶。)

我：錫蘭紅茶？

Stephanie：係呀！點解你知嘅？(她的樣子十分驚訝！)

我：我係一個蛋糕痴嚟㗎，如果係富有質感嘅海綿蛋糕，最好係配錫蘭紅茶啊！

Stephanie：(淡淡的微笑使炎夏的朝陽出現.....)

我：真係好好食，多謝你啊師父！

Stephanie：你叫我師父？唔好啦，我同你一樣大，你一係叫我Stephanie，一係叫我小S吖！

我：知道！小S你好靚啊！(死啦，發神經講咗出嚟！)

Stephanie：...我.....唔好意思...失陪一陣！(她面紅地尷尬低頭。)

我：(唉，做咩亂講嘢，失禮表姐啦，但究竟堂姐講個句我堂妹好易氹係咩意思呢！)

Stephanie：個蛋糕真係好好食咩，真係咁好食？睇嚟你真係好鍾意食蛋糕，我整嘅蛋糕成日都食唔晒.....(她的樣子猶疑中帶點快樂。)

我：如果有蛋糕食，我可以代勞㗎！

Stephanie：真係？

我：嗯嗯！

到了晚上，我即將離開，臨走前，我們交換了電話，若果我想再做蛋糕，就可以找她。其實Stephan

ie真是很棒呢！做蛋糕又好，又夠耐心，心想自己都不是做蛋糕的材料，都是品嚐蛋糕才是我專利。既然Stephanie做蛋糕這麼好，當然不要浪費這些人間極品啦！不過，總覺得小S不是太開心，好像很多難言之隱，是我想太多？

偶然湊巧初相遇(下)

過了兩天，做蛋糕的心癮又起！不是！是吃蛋糕的心癮又起了！所以我再次找Stephanie！不用付錢，又可吃一生中摯愛，有誰不想？吃蛋糕真可使我喪心病狂，絕對是玉皇大帝，我都不會禮讓！這次還有一些特別的驚喜啊！

小S：你黎拿？

我：係呀！

(她還是穿著未及膝的短裙，笑容可掬的，散發著青春可人的味道！)

小S：我啱啱焗起咗個檸檬批啊！你幫我試下味吖！

我：好啊！好啊！好啊！好啊！

小S：點呀？味道如何？

我：嗯.....甜度適中，就算食多都唔會"漏(膩)"！

其實檸檬批是一樣簡單的甜品，但不是人人可以烤得好。蔡瀾：「愈簡單的，愈難做出水準！」絕對可以涵蓋這個意思！

第一，餅底要烤得好，外邊要脆，底部要軟。

第二，蛋白糖霜要輕輕地帶出檸檬香。小S的檸檬批跟坊間的不太一樣，蛋白糖霜較薄，但是餅底之上有少許檸檬果醬，檸檬批略帶黃色。比起坊間的檸檬批，她的檸檬批檸檬味特別香濃，同時又不失甜度，對我來說，是一種極致！

我：你加咗檸檬皮？

小S：你又知既！(她瞪了一眼，側側頭顯得很可愛。)

我：雖然好少，勉強都食得出既！加檸檬皮唔會澀咩？

小S：會嫁！所以我加橙酒同糖一齊煮，澀味應該輕微啲！

我：好聰明啊！

小S：邊係呢！

我：依個係我食過最好既檸檬批！可唔可以比我打包啊？

小S：既然你咁鍾意，好吖！一陣比個紙盒你裝住！反正我一個人食唔晒！

我：好野！太好啦！

小S：食完之後，我地繼續啦！

我：好既！

如是者，我在這個暑假來來回回做了約十多次蛋糕。經過這段時間的相處，我們漸漸混熟起來，尷尬場面亦開始減少，成為朋友。不過，有些事總是放不下，或許是我太多口.....在暑假前的最後一天，就發生小風波。其實不算是風波的，但是場面變得奇怪。

我：依個暑假以黎真係打攞晒！

小S：都唔係好打攞啫！

我：其實我會唔會阻到你啲屋企人啊？

突然靜了一靜.....

小S：.....唔會啊.....我.....！如果你返學日子想整蛋糕，都可以搵我嫁！

我：係呀，多謝你！走先啦！遲下再搵你，就黎返學，你要努力啲啊！

小S：嗯！Bye Bye！

轉眼間，中四學期開展了，經過九月份的適應，十月開始上回軌道，回復平靜日子。偷閒的日子，我會找小S做蛋糕，藉此消磨時間、紓緩壓力。直至到二月，因為今年新年假期提早，所以二月大多數是上學日子。恰巧是十四號，「情濃二月」----情人節。對我來說，這些日子完全不太特別，我將重點放在吃巧克力上，可能是因為沒有情人或意中人的關係吧！就算有情人，已經是接近兩年的事了，不太喜歡想起舊時。

Tyler：點呀你？有冇人送野比你啊？

Tyler是排在我後面的同學，心地挺好，異性緣比平常人好，但不是一位「玩家」，與我嗜好大致相同，上討論區、看動漫等。他也受過情傷，打後日子，我倆可憐男人都經常說感情事！

我：冇啊！邊得你咁風情萬種吖！

Tyler：這些機會不是屬於我的！

我：你都唔鍾意食甜野，有既唔好晒，比兄弟我慢慢享用啊！

Tyler：冇先算啦！

在這個時候，有電話打來，小S？難道.....哈哈！我想像的東西與大家想像的東西有很大出入，我所想的是難道有新款蛋糕試？我知道大家一定是想情人節情意濃濃的愛情！

Tyler：喂！有電話搵你㗎！咦！好似係女黎㗎！

我：會唔會係咁啊？

Tyler：(Tyler古惑地向我微笑。)

我：聽個電話先！

我氣定神閑地接聽.....

我：喂！

小S：小Den！

我：小S，搵我有事呀？

小S：其實唔算係咩事既！有野比你試下嫁！

我：又有新野食？

小S：都可以咁講既！你放學上黎我屋企Ok嗎？

我：Ok啊！到時見㗎！Bye Bye！

小S：Bye Bye！

我裝作甚麼事也沒發生.....

Tyler：仲唔係女，嘴角含春，又笑笑口.....

我：唔知呢？你估下！（咁都比你發現添.....）

Tyler：一定係啦！

我：行啦！咁多嘢！一齊搭地鐵啦！

臨離開前，Tyler說了一句「玩得開心點啦」，我只是一笑置之，心想著：「還是遲些再同你解釋吧！」.....

我滿心歡喜地去小S家，究竟有什麼新奇有趣可試呢？

我：Hello！

小S：咁準時既！

其實我是第一次見到小S穿校服，感覺挺有趣。因為她穿很可愛，加上她不經意冷冷的樣子，當兩種元素融為一體，只能說有趣，是一種使人心跳加速的有趣。我心想著：「若果班上有妳的話，是這麼好呢！」

我：Ok啦！

小S：拿！請你食架！情人節，男仔收到朱古力都應該幾開心既！

我：你又知我鍾意食Godiva 既朱古力既？

小S：我打電話問過你表姐嫁！

我：咁細心啊你！朱古力我都好Like啊！

小S：仲有嫁，琴晚我做咗酒心朱古力，試下吖！

我：咁我即係又食又拎！

小S：咁你都諗到！（她伸一伸舌頭，是小妹妹的小動作！）

其實情人節送巧克力未必是有什麼特別意思！我可能太過喜歡吃甜食，小S才會送我喜歡的巧克力，我亦相信她也有同樣想法。一個愛吃，一個愛整，自自然然就會成為一對特別的朋友。如果這是愛情，真的不知是怎樣？

餘下的三個月又要為考試奮鬥，平平穩穩地又渡過了，尚算不錯呢！經過了一年又逐漸步向暑假，在暑假開始的前幾天，我還是去了小S家做蛋糕，可能是一種習慣吧！

我：時候唔早啦！我走先啦！

小S：Dennis.....

我：嗯，做咩啊？（我心感不妙！）

小S：可唔可以.....（她愈來愈細聲.....）

我：聽唔到啊，可唔可以咩啊？

小S：可唔可以暑假黎我屋企陪下我.....黎我度住啊.....

弄不清愛與可憐(上)

當時我有懷疑過我有否聽錯，有些少愕然，在你家住是什麼意思？我還要補課，又怎向家人交代呢？不過，我答應了她。我從小都不喜歡別人不快樂，所以開心的多，悲哀的少。看住她可憐的臉，要說拒絕未免太難開口，加上我覺得她有許多難言之隱。一個女孩究竟要多少勇氣才能說出這些話？我絕不可以說要補課等等原因，因為我根本不忍心推卻她！

我：係呀！但我要幾日後先得啊！你介唔介意吖？(我充當鎮定！)

小S：唔介意啊！唔介意啊！我等.....你啊.....依條係屋企鎖匙，你過幾日黎吖.....

坦白說，我真的很尷尬，就連鑰匙都給我，真的不知所措。我並沒有猜想她的意思何在，只是輕輕地答允。

我：唔該你，Bye Bye！

我沒有聯想到其他東西，我只知道應怎樣向家人交代。在這個時候，我知道表姐可以幫到我，所以就直接找表姐了。

我：表姐！

表姐：搵我又咩事啊？

我：我.....

表姐：做咩啊？做錯事？

我：唔係啊！我要去小S度住啊！表姐幫幫手同我屋企人交代吖！

表姐：下.....你地.....咩關係？

我：我地唔係咁嫁！總之唔係啦！你唔好問啦，我都唔知咩事！

表姐：好啦！你想我點幫你吖？

我：你幫我作個理由同你一齊又好，點都好啦！

表姐：好啦！

我：若然知道咩事之後，我再同你解釋吖！

表姐：得啦！我幫你啦！

我：唔該你啊！

表姐果然幫我作了一個謊言，總算解決家人的問題，畢竟表姐的說話的確有說服力。下一個問題又來了，究竟我要帶什麼東西去小S家呢？這次情況非常不同，不是即日離開，而是借宿逗留。最後，我只帶幾件日常行裝，因為早上有要事辦的關係，所以我晚上才到小S家。

叮噹.....叮噹.....等了許久亦沒有人回應，唯有用鑰匙開門吧！踏進屋內，只見小S醉醺醺地躺在沙發上，臉蛋紅紅。茶几上有一枝紅酒，一隻酒杯。她穿著深藍色連身短裙，我難免有些尷尬。我一直呼叫著她，但她已經醉得昏迷，所以我抱她回房。她真的很輕，像羽毛一般，不需用力就可抱起，又因她身型修長關係，配合連身短裙，加上醉醺醺樣子，真的很美，很美，美得像睡美人。我放在床上，為她蓋上被子，就拿了一條熱毛巾幫她抹抹額頭。雖然我欣賞她許多東西，但乘人之危的事我絕不會做，我就回客房睡覺了。

翌日，我可能不太習慣，所以大約九時，我就起來了。見小S未醒，住在人家中不可能白吃白住吧！我決定煮早餐！煮饅是我拿手好戲，玩弄這些小把戲我最厲害呢！不足二十分鐘，我就煮起兩份早餐，剛好小S朦朦朧朧地醒了。梳洗過後，她到了客廳，瞪大眼睛看著我，眼神充滿驚喜，與我迎面而坐。

我：試下我手勢吖？平時你成日整野比我食，今次到你試下，都整得唔錯嫁！

說完這句後，她哭了，她哭了，哭得很厲害，是一種極度徹底的哭泣，像滂沱大雨。我一向極度感性，易受別人、情感的感染，看著她哭，我也感到心酸！我從來不喜歡哭，但我卻是一個易哭鬼呢！我遞上一張紙巾，為她擦乾眼淚，清晰地看見她臉上眼痕，很快又被她洪水淹過了。我撫摸她的頭.....

我：做咩啊？係咪唔開心啊？(我好像面對著表姪女哭泣！)

小S：.....好耐.....冇.....人煮.....過早餐比我食啦.....(她的啜泣聲很淒厲！)

我：好啦好啦！唔好喊啦！我日日煮比你食啦好唔好，啲早餐凍晒啦！趁熱食啦！

小S：.....嗯！

其實我亦不知道這份早餐的意義何在，不過她哭得很可憐，相信任何男性見到都會有些少共鳴，都不會視若無睹。本來，我亦想跟她說我要外出補課，但最後我決定收回這句話，不去補課。

由始至終，我仍不知道小S發生什麼事，只是發現她經常獨自一個，看起來很孤獨。我亦不好意思去問，作為朋友，若她相信我，就自然說出口吧！

吃過早餐，小S心情逐漸平伏，我也回房做功課，亦想下今晚應該煮什麼。小S亦回房畫畫，她修讀視覺藝術的，但不知道她畫功如何，依我估計，應該都不差吧！大約兩小時後，我在房中聽到小提琴聲，很熟悉、很動聽，使人很舒服，像置身於人間仙境。用小提琴拉出的搖滾卡農起伏節奏十分柔和，猶如少女的纖纖玉手，這首曲便是我練習鋼片琴的失敗之作。想不到，小提琴演繹這首曲有另一番風味。我出廳倒一杯水，凝視小S房間。

若果大家沒聽過，可試試聽。<http://www.youtube.com/watch?v=qbt-oBkHc0c>

小S：係咪阻住你啊？騷擾到你？

我：唔阻啊，首搖滾卡農拉得幾好聽吖！

小S：嗯！

我：我一出去啊，夜晚之前我會番黎嫁！

小S：好既！

因為要回將軍澳一趟，所需時間都不少啊！在回去小S家時，順道買煮饊材料。我開門！

小S：係咪出去食飯啊？咦，你買咗咩啊？

我：唔好出啦，出去食飯或者叫外賣好唔健康嫁，等我煮啦，你等一等啦，好快就可以食。

小S：真嫁？

我：係呀！唔想我煮？

小S：唔係啊！唔係啊！

我：咁就得啦！（我眨了單眼示意。）

因為時間太稀少的關係，我只買到很少材料，唯有盡量發揮小宇宙吧！恰巧見到有一枝日式燒汁，所以蛋黃就做椰菜蛋餅，蛋白就炒賽螃蟹，加一碟粟米魚柳，就大功告成。賽螃蟹，是姨媽教我炒，雖然只有五成功力，但也不算不過不失，應該不會失禮。我亦煲了桂圓紅棗杞子茶，就算在夏天，小S手腳依然冰冷，希望她會感覺好一點。

我：食飯啦！

小S：依碗係咩黎嫁？

我：哦！依碗係桂圓茶！甜甜地嫁，你成日手凍腳凍，依碗野好啱你嫁！

小S：係呀.....

我：拿！唔準喊嫁，快啲食啦！

小S：嗯嗯.....(她的眼淚在眼眶內浪下浪下！)

我：好唔好食啊？我好耐冇煮啦！

小S：好.....食.....啊！（她略帶些少走音！）

我：真係好啦！

李清照《武陵春》：「欲語淚先流！」正好形容她這個愛哭鬼！原來真的有人比我易哭，希望她的眼淚是出自感動，不是出自哀傷吧！

又過一天，我們都是這樣度日，今天不同的是我們晚上喝紅酒，發生了特別事.....

小S：你飲唔飲啊？

我：但係唔好飲到咁醉，我見你個日.....

小S：嗯嗯！

喝了幾杯，我們已經臉紅紅，有少少神志不清。

小S：我好耐冇試過咁開心啦！多謝你，阿Den！

小S：自從中二起，我就自己一個人住，Daddy要去外地工幹，媽咪陪佢，係香港剩低我一個，佢地好耐冇返黎啦！我一個人生活日子好苦悶、好寂寞，無論咩日子，我都係自己一個。又成日訓唔到，夜晚會食安眠藥，屋企好靜.....整蛋糕就只有我一個同埋幾個好姊妹食，我好似咩都有咁啊！

聽了她的剖白，我的心突然冰冷起來，我很心痛！一個人的寂寞冷清，對著家中的四面牆，絕對不易捱過！獨自一個享受的確會多些自由，但長久下來就是說不出的痛苦。我亦很憤怒呢！為什麼連自己的女兒都拋棄？我不期然地擁抱著她！

我：仲有我啊！唔好喊，我好心痛啊！（我衝口而出！）

小S：多...謝...你陪我啊！好耐冇試過有人對我咁好啦！

我：我.....

當時小S掩著我的嘴，說了一句。

小S：我想你啊！你日日陪住我吖！

她輕輕地吻了我的嘴唇，我們當時呼吸急速，心跳得很快、頻密。她的嘴唇很柔軟，略帶濃烈的酒香，味道像甜絲絲的綿花糖。舌頭不自覺地互碰著，交接感覺很誘惑，整體的感覺是無止境的輪迴。我們神志不清地步向床上，就很快地睡了。

醒過來，我的頭很痛，只是隱約地記得昨晚的片斷，看著天花，有一種不熟悉的感覺，這不是客房！我起來，這是小S的房間，睡在我旁的是小S！怎麼辦？怎麼辦？幸好我沒有衣衫不整，但是與一個女孩同床，少不免難為情。我決定悄悄地走，但小S摑住我的手臂。

小S：唔好走啦！我地.....

我：飲得太多啊可，我有啲頭痛！（我突然插口！）

小S：我擺頭痛藥比你吖，我.....永遠記得琴晚，多謝你！（她向我耳邊哄過黎！）

我：哦.....唔該.....

我依稀記得昨天的法式濕吻，想起來亦面紅耳赤。我很矛盾，我想念當時的熱吻中萬馬奔騰的感覺，又為這熱吻感到慚愧不堪。我倆的關係是什麼？情侶？昨天明顯是一個意外！腦海裡浮現出一個未知的問題，你喜歡她嗎？我應該如何回答，我對她的感覺挺劇烈，對她的自我剖白又感到可憐，只想她有多些快樂日子或者保護她。

小S：拿！食完你訓一教，我地再出去食飯吖！

我：嗯！

睡了一覺後，頭腦逐漸清醒，但我仍未拿捏對她的感覺！

小S：你醒拿？梳洗完就出去食野，我都啱啱焗起蛋糕，今晚返黎食吖！

我：好啊！

我們踏出門口，小S就搵起我手臂，倚靠著我的肩膀。她穿著一對三吋高跟鞋，顯現出她窈窕的身型，加上42吋長腿，確是芳華盡現。笑起來兩眼有小小的臥蠶，秀麗的長髮，感覺很唯美。有男生會不心動嗎？接著，我們拖著手，一起走，她的手很幼滑，像初生嬰兒皮膚。雖然這種感覺舒暢，但我曾想過鬆開，因為我倆關係並非一下子可以解釋。我亦不知她對我的感覺如何，想倚靠我，抑或是想做情侶？

在萬籟俱寂的晚上，我正想回房睡覺，小S卻拉著我的手。

小S：陪我.....吖！黎啦！（她淘氣得像小朋友。）

我：好啦！你好扭計啊！

小S：一齊訓吖！

我：咁樣唔係太好了！

小S：咁你等我訓咗先走吖，或者陪我傾下計。

我：不如講個故事比你聽！

小S：嗯嗯！

我說故事的確拿手，這亦是哄表姪女睡覺必用的絕技。小S未聽完整個關於金蘋果的故事，已經酣睡入甜夢中。我在離開前，情難自控地吻了她的前額，這「睡美人」實在討我歡喜。或許，我的確是喜

歡她！也可能是如何可以不愛她！

弄不清愛與可憐(下)

一大清早，我已經外出，留下了一張字條。大約四時，正當我入屋之際.....

小S：你返黎拿？(她果然笑顏無敵！)

我：嗯，我一振煮晚餐.....依幾位係？

小S：依幾位係我好朋友兼好姊妹啊！介紹你識吖！依位係Janice, Ashley, Katherine.

我：Hello！你地好！

Ashley, Katherine：Hi！

Janice：(她冷冷地點一點頭，臉上只有冰冷表情，並沒有一絲的笑容！)

小S：佢地個個都好靚，全部都係女神黎啊！

Ashley：邊係呢小S？你未又係咁靚！我一見到你就想溝你啦！

Katherine：Ash，你好百厭啊！

Ashley：(伸舌！)

Janice：(掩口笑一笑！)

她們應該是小S最好姊妹了，大概地介紹一下。Ashley，一個活潑可愛的女孩，臉蛋可愛，個子很小，在她們中最矮，應該很受男孩歡迎。

Katherine，屬於大姐姐型女孩，聲線滋性，挺吸引，不遜色於Ashley。

Janice，可以怎麼說呢！她是一個九頭身美女，有一把略帶啡黃的長髮，眼睛大大水汪汪，兩眉細緻如畫，稍比小S矮些少，冷冷的笑容使人有觸不及的感覺。她是小S的最好朋友，稱她是「宅男女神」，她愛看動漫，聲線冷艷，聽說嗜好與我挺相似，Janice的樣子很耐看和灑脫。

在我來說，她們JASK四位都是美女呢！都會是普通男孩會喜歡的類型！

我：我叫Dennis，多多指教，我入去整野先啦，你地慢慢傾啦！

介紹完畢，我就到廚房弄晚餐。她們四姊妹就繼續有傾有講，在廚房隱約地聽到她們的對話，我就偷望一眼。

Ashley：小S姐姐，Dennis係咪你男朋友啊？

Katherine：(她向小S掩嘴微笑！)

Janice：(她平常地夾頭髮。)

小S：.....唔(嗯).....係！(她垂下頭，面上泛起了紅暈。)

Ashley：聽唔到啊，係唔係啊？

Katherine：小Ash，你成日都係咁啦！又麻煩又跳皮！

小S：.....(紅暈已散到整張臉上，久久也散不去。)

Janice：Ashley妹妹黎Janice姐姐度，唔好為難小S啦！(她終於開口，感覺好溫柔.....)

Ashley：我要攞攞嫁！

Janice：係啦！係啦！

Ashley：好野，我攞到「宅男女神」，好多人都"恨"都"恨"唔到啊！

Katherine：我都好想要啊！

小S：啫係冇人攞我啦，唔開心啊！

Ashley：你咁受歡迎都唔駛我地啦！(小妹妹的稚氣盡現！)

Katherine：不如我地跳舞唱歌啦！

小S, Janice, Ashley：嗯嗯！

她們應該是少女時代迷，又唱又跳演繹幾首名曲。她們真的唱得不錯，Janice聲線挺舒服，跳舞也不俗，畢竟是個美人胚子。小S有完美身型，跳舞絕對姿態盡現吧！Katherine唱歌都很迷人，繞樑三日。Ashley經常做古怪表情，活力過人。在她們的言語之間，我知道她們感情好深厚，亦知道她們很受歡迎，還有很多追求者。

我：唔好跳啦，靚女食飯啦！

Ashley：係係係！我黎啦！

我, Janice：咁可愛既你！(我倆同時地說出口！)

Ashley：你地咁樣讚我，我好怕醜嫁！

Katherine：係唔知醜先啱！

今天本來煮兩個人份量，幸好我買了應付多天的材料，剛剛足夠，畢竟她們只是四位女孩，但使我驚訝的是Ashley個子矮矮細細，食量竟然不下於我。我煮的Spaghetti, Risotto，她竟然吃了不少，更加想不到的是，本來我想獨吞的螃蟹，Janice竟然喜歡吃。

Ashley：啲Risotto好好食啊！

Katherine：你又食咁多啦，知唔知飽嫁！

小S：由得佢啦！

Ashley：食埋你都仲得啊！唔知Katherine依位音樂小姐係咩味呢？

Janice：佢又黎啦.....(她笑現臥蠶！)

我：噢！仲有一碟蟹啊！我知小S就麻麻地，你地呢？

Ashley：要剝殼好麻煩啊！

Katherine：哈，夠你麻煩！我對蟹有敏感，唔食得啊！你同阿Jan食咩，佢好鍾意食蟹嫁！

我：哦！

Janice：嗯嗯！（她不經意地眨了一眼。）

我：咁我同阿Jan慢慢食啦！

經過這天，我就認識了三位朋友，陽光活潑Ashley，成熟迷人的Katherine，嫵媚冷豔的Janice。認識了她們，比起認識班內的「港女」好了一大截啊！她們又沒有架子，的確是一班知心好友呢！

其實我已經住了十二天有多了，但是我仍未清楚自己的心意，究竟我對小S的愛，是出自對她遭遇的可憐，還是真誠的戀愛呢？我沒返回家中多日，總需要回家，有必要彌清這段親密關係。終於到了第十五天.....

我：小S，我要走.....啦！

小S：嗯.....！

我：相處咁多日，我想話你知，你真係好靚，你同高跟鞋真係好夾，你修長身型令我好心動同欣賞，不過你唔好喊啦，你成面淚痕唔靚嫁！

小S：係.....(淚水準備流出來！)

我：條鎖匙還比你啦！

她突然給我一個充滿信任的擁抱，我亦抱緊她！

小S：唔好啊！條鎖匙永遠屬於你嫁！你Keep住佢，等閒黎搵我，我等你啊！我好鍾意你！希望你心裡面會掛住我！你真係好暖啊！

我：傻瓜，做咩喊啊，我都鍾意你啊！你好叻，好堅強，又溫柔又體貼，又識整我最鍾意既蛋糕！應

承你，我會再搵你，只要你諗起我，我就係你身邊。你喊我幫你抹眼淚，你整蛋糕我幫你食晒佢，你寂寞我攞你！

小S：嗯.....多謝你.....

經過十五天的相處，我們成為一對若隱若現的男女。在別人眼中，我們是一對情侶。在別人口中，我們沒有承認亦沒有否認情侶關係，潛於黑幕之中，若即若離。

潛伏黑幕的情侶(上)

又踏進新學年的第一天了，也許是剛剛過了畢生難忘的暑假，我上學依然朦朦朧朧，元神未回，飄浮於虛幻仙境。

Tyler：喂，做咩暑假唔番黎補課？

我：下.....點講好呢？

Tyler：有野隱瞞！

我：邊有呢？真係你吖！遲下一次過講比你聽啦，好難講！

Tyler：好啦！唔好比我知你有女，都唔同我講，又或者唔介紹比我識啊？

我：點會呢！

Tyler：如果係咁，我實對付你啊！

我：哈.....哈...哈...哈.....

我會說自己在戀愛嗎？絕對不會，因為我根本不知道！我們可以是黑幕中的情侶，也可以是曖昧中的男女，都可以是隱藏關係的摯友。

若要重新地說起這個暑假，我可以確實地說十分難忘，無法評論當中是喜是悲，只知道一個女孩需要一些安全感。經過這次後，我向表姐交代，堂姐亦知道發生何事，她們已經把我們當作成情侶了。但實在難怪她們會這樣猜想的，平常的朋友不會這樣親密。

在往後日子，我沒有避嫌，繼續找小S，每星期有兩至三天，她會做許多款式的蛋糕給我。通常我們相約在地鐵站，坐在一方，她緩緩地把蛋糕分成幾小口，然後餵向我。

我當時的身體暴漲了許多，幸好做了三倍運動，才能抵禦甜品攻勢。不過，我相信這是一種幸福，不只是味蕾上的幸福，也有心靈上的幸福，皆因我認識這位「甜品女孩」。

中五這些日子，最難忘的可算是做獨立專題報告(IES)的日子，雖然數據是偽造出來，但參考書確是在圖書館找的。

我不得不去圖書館，借幾本沉重的書。因為將軍澳圖書館沒有這類參考書，所以唯有去中央圖書館找。在機緣巧合之下，我竟然遇見Janice。

但她在桌上小睡，看來睡得很甜，不知道我見到她。圖書館的空調實在太冷了，我進來不足二十分鐘，已成了一條冰棒。她衣衫單薄，又只穿著牛仔熱褲，極大機會著涼，所以我脫下外套為她蓋上，並且留了一條字條。

「宅男女神Janice：

中央圖書館很冷，不要在這裡睡著，會很易著涼，小心身體！

你睡得很甜，不打擾你了，你暫時保管住件外套，下次見面才還給我！

Dennis上」

大約半小時後，我收到Janice的短訊，內容大致上是謝謝我的外套。但有一句使我驚訝的，是這一句「你很體貼！」，我真的猜不到Janice略帶少許冷酷的性格，會直接稱讚別人。或許，我的確很體貼，這就是屬於自己的性格，太喜歡照顧別人。

兩星期後，因為家人約了我在銅鑼灣吃午飯，順道到中央圖書館還書，我又再次遇到Janice，跟她挺有緣份。當我從書架中拿了一本書，她走過來拍拍我的肩膀，還給了一件外套，並附帶一張字條。

「Dennis，今晚介不介意跟我吃炒蟹啊？」

我很想吃，但沒有人陪我，Ashley, Katherine, Stephanie都不太喜歡吃。」

我向她表示一個「Ok」手勢，指著錶，舉起代表七點的手勢。她點點頭，就回到桌子看書了。我倆就到了銅鑼灣最著名吃避風塘炒蟹的店舖，二話不說，就點了一碟炒蟹和一枝啤酒。但我們再次不約而同地舉手.....

我：阿Jan，做咩舉手啊？

Janice：你呢？

我：我諗住埋完單先再食，會舒暢啲囉！

Janice：因為食完隻手會污糟，所以埋完單先再食！

說完這句，我們不約而同地笑了一遍，大家剛好想著同一樣，實在太巧合，而時機又恰巧相同。

我很少見Janice的笑容，果然有非一般的韻味。她臉龐泛起少許紅暈，嘴巴微微地露出月牙似的牙齒，眼眸不經意由上而下地充滿害羞的打望，這種笑容必定讓男士們神魂顛倒。吃完後，我們懷著滿足的心情離開，Janice打了一個「謝謝」手語，我亦勉強地回應一下，就道別了。

經過一系列連續的測驗，終於到了十一月中，我與她們姊妹四人相約地打羽毛球，因為我經常睡過頭，所以在前一天到了小S家中睡。

因為早上要上課的關係，又是晚上才到，但小S當天剛巧是教師發展日，所以放假一天。她經常提醒我，放學後早些回家吃蛋糕，承諾給我無限驚喜。

我：我返黎啦，小S大人！

小S：你返黎拿！

我：蛋糕呢？

小S：剩係掛住啲蛋糕，唔駛理我嫁啦！你好過份啊！

我：哎呀，有人髒髒豬囉，我去跪玻璃啦！

小S：得啦！唔準跪住！你估到係咩蛋糕就有得食！

我：估唔中咁點？

小S：冇得食！

我：咁我唔估，等人自己一個食晒佢！

小S：麻煩到死，比你食啖先估啦！呀~

我：呀~

小S：點咩？係味好香甜呢？

我：好香栗子味啊！你隻手做咩咁紅又損咗既？(我簡單地問候。)

小S：搥栗子囉！

我：你個傻瓜咩！

小S：我記得你鍾意食嫁嗎！

我：你應該都知整栗子蛋糕可以買現成栗子蓉或者栗子粉！

小S：係啊！不過唔夠天然，你咁嘴刁實食得出既！

我：我鍾意食啫，你唔駛咁體貼嫁！你一定係逐粒栗子搥啦！

小S：係呀！搥咗成日先夠份量渣！

我：傻仔，栗子係用毛巾搥嫁，唔係搥嫁，你咁樣搥到世界末日嫁！(我按她額頭。)

小S：點知啫！

我：你咁有心，我幫你食晒佢咩！

小S：唔得啊！你唔可以食晒啊！

我：下！

小S：有一半係整比阿Jan嫁！

我：阿Jan？

小S：佢都好鍾意食栗子蛋糕嫁！

我：係咩？

小S：你地啲口味根本一模一樣既！就連習慣、嗜好都差唔多，打機、睇書、上討論區啦！

我：哦~哦~哦~

小S：就連性格都似似地添啊！

我：係咩？係咩？咁你未好抵囉，整一樣野有兩個人同你食！你應該整多啲啦！

小S：抵你個頭！冇心肝！

我：過黎等我睇下你隻手！

小S：算你啦！咦！咁啱有日落啊，你睇下！

我：你未就係我既日落囉！

小S：(她的嘴角微微上揚，開心的情緒難以掩蓋！)

Janice和我無論在品味、嗜好、味覺方面都很相似，難怪我們這麼投契，有位好朋友、好知己能夠共同分享，也未嘗是一件樂事。

小S這個傻瓜，對自己的好朋友像親人一般，還無時無刻記住她們的口味。經我多次追問，原來小S與Janice的交情已經不是一朝一日的事情，而是可以追溯至幾千年。

從小S的話語當中，可見她很喜歡阿Jan，每逢幾句交接之際，多次稱讚阿Jan又善良又美麗。由她們開始相識，到說到遇上Ashley, Katherine，繼而說到她們JASK的姊妹情，足足地說了整晚，就好像橫跨了幾千年的中華文化，由儒家孔子說到道家老子，三隻字「我投降」。

最終要半夜才能中止話題.....

第二天，我們就到體育館打羽毛球，我仍然迷進了夢鄉，眼睛也未曾瞪大。見著她們雙打，就稍為形容一下吧！

其實雙方都有一定的默契，但明顯是小S和Janice這邊較有優勢，因為她們這隊是「長腿組」，加上小S和阿Jan雙手均可握拍。小S左手可以在畫板畫線條，右手填顏色，所以互換左右手當然是輕而易

舉。至於阿Jan，不知道受什麼特別訓練，步法快，行動利落，左右手皆可用，我對她們打羽毛球都吃了一驚。

另一隊的Ashley和

Katherine，雖然身體優勢上較不利，但是Ashley貫徹她的活潑動力，打不死意志，不是輕易被擊倒，並且有冷靜判斷力特強的Katherine輔助，可以準確判斷羽毛球位置，都不可以忽視。

但若果我跟她們比賽，我可能會落敗呢！因為她們各有美態，我害怕會分心，Janice的清秀，Ashley的活力，小S的笑顏，Katherine的小動作，所以我應該輸得一敗塗地。接著，我輕輕打了幾球，但她們從不留手，唯有盡力應戰吧！小S和阿Jan每下子都用力跳殺，阿Jan呼叫的一下，真的很熟悉，是一種似曾相識的感覺，不過應該是記錯了吧！

輸贏根本是不重要，但事實我是落敗的，我絕對承認。因為樂團將要參加比賽，要加操練習關係，所以提早離開。

離開後約十分鐘後，收到小S的短訊，「一齊去除夕倒數好嗎？」，我答應了她，反正今年家人比較繁忙，除夕倒數應該都是各自精彩。其實我是個善忘的人，即使我答應了別人，也可以在瞬間忘記，希望她會時常提醒我吧！

十二月二十日，是這一年來最寒冷的日子，可算是季東之最。在早會上，我收到堂姐電話.....

我：堂姐，做咩啊，返緊學嫁！

堂姐：唔好意思啊！Miss打比阿姨，阿姨再打比我，好似話小S病咗冇返學啊！

我：咩咩邊個打比，再打比邊個話？

堂姐：唉！總之係小S病咗啦！我今晚要開OT，所以我堂妹就交比你啦！係咁啦！唔該晒！

我：喂~喂~喂~

堂姐：(掛斷了！)

堂姐真是行動迅速，隨風而來，隨風而去，掉了幾句不清楚的說話又走了，都不知怎形容好了。小S病倒，我當然要探病，堂姐既然將她交給我，我絕不可能不答應，加上小S自己一個住，生病了倒是十分麻煩，又沒人照顧，有許多潛在危險。

放學後，我再次掉棄學校的工作到小S家，一直呼喊著小S的中文名字。原來小S剛吃完藥睡著了，她一直低聲說著：「我們還要除夕倒數.....」。

我替她換了額頭上的冰袋，這時有人按下門鐘，是一個穿著校裙的女孩，看真一點原來是Janice。Janice穿起校裙更顯的靈氣，將校服特有的少女氣質散發到另一個層次，清純而不失大體，真實而不失可塑性，可算是人穿衣服，並非衣服穿人，發揮得淋漓盡致。以上只涉及個人評價矣！

我：阿Jan！你黎咗既？

Janice：嗯嗯.....想睇下小S佢點吖嗎！

我：佢訓得好霖。

Janice：佢件衫濕晒，我都係幫佢換件衫先啦！（她的情緒由緊張到焦急！）

我：咁我去煲定粥先！

Janice：好吖！

一會兒後.....

我：好彩有你渣阿Jan，如果唔係，我都唔知點同小S換衫！你今日冇野做？Ashley佢地呢？

Janice：唔係啊，本來今日要練琴既，不過見小S冇返學，有啲擔心，所以黎睇下佢囉！至於Ashley被老師留低咗，咁Katherine就睇住佢，詳情你都係問番佢本人啦！

我：阿Jan，你真係好好啊！唔怪得知，小S開口埋口都讚你又好又善良又靚啦！

Janice：邊係呢，佢成日都係咁嫁，亂咁講！練琴幾時練都得啦，係依度一樣可以練，以前我係小S屋企練嫁，我仲唱歌當氹佢訓教添。

我：哦~咁下次一定要聽下啦！係呢，肚唔肚餓啊？

Janice：都有少少，放學我已經趕過黎都有時間食野，原來已經七點拿！

我：不如整個即食麵比你吖！

Janice：好啊，不過我要.....

我：你要硬啲吖嗎！我記得我同你口味一模一樣！

Janice：係啊！唔該你！

九時正.....

我：時間唔早啦！

Janice：係呀，我都係時候返屋企啦！

我：不如我地寫張紙仔係小S床頭啦！交比你啦！

Janice：Ok！

經過這次，我又再次深入地認識阿Jan，難怪小S會很喜歡她，她真的有顆天使心，是一份既真誠又

溫柔體貼的心，與她外表一樣純潔動人。

若果這個世界有多些這類朋友在生命中扶持，我敢說無論前路有多暗，亦會熬過去。若然大家在生命中巧遇一兩個，就要永遠珍惜，因為不是人人都幸運地遇上，相遇確是好不容易。

潛伏黑幕的情侶(下)

轉眼間，到了除夕夜當天，我們相約在中環皇后像廣場。除了她們四姊妹外，還多了兩個男孩，一共七人。

聽聞這兩個男孩是衝著Janice而來，應該是仰慕者，一位叫Patrick，一位叫Matthew，兩位相貌堂堂，驟眼看人品也不錯。

若果我是Janice，可能我也選不下手，可實行一妻多夫制！但Janice對他們顯然有點冷淡。另一個焦點，小S跟阿Jan黑絲長腿真的非常吸引，眼球根本不想移開.....

Ashley：Dennis，從男仔角度，你覺得邊個好啲啊？

我：我從男仔角度，我覺得我最好！

Ashley：唔係啊，係佢地兩個邊個好啲啊？

我：好難揀！你睇啱邊個啊？

Ashley：嘩！人地都唔係為咗我而黎既！人地為阿Jan專誠黎嫁！

我：即係有人冇人要啦！呵呵呵！

Ashley：係咪想我做低你啊下？

我：唔敢！不過阿Jan好受歡迎！

Ashley：係呀，都有我一半嫁！

我：至威係你啦！

大約十一時四十分，我感到有點涼意，決定買一杯咖啡喝。

小S：我陪你吖！

我：唔好啦，你著住高跟鞋行黎行去，咁多人撞死你啊！

小S：好啦！快啲番，我等你啊！

我：嗯嗯！

Janice：等一等，我都要去洗手間啊！

我：咁一齊啦！

我在洗手廁附近等待Janice，出來後，我們眼見太多人聚集，已經不能再往小S方向移動，就連她們

的影子也看不到，所以打電話通知。

我：喂！小S！

小S：你地係邊啊，仲有一分鐘就到十二點啦！

我：太多人啊，我地行唔番過黎啊！

小S：唔緊要啦！你係電話同我倒數吖！

我, 小S：三、二、一！Happy New Year！

小S：希望.....每一年都可以見到你！

我：嗯！

小S：幫我同阿Jan講埋Happy New Year吖！一振見！

我：阿Jan，Happy New Year！

Janice：You Too！

因為人潮開始陸續散去，所以掀起一波又一波的人浪，湧向我們。Janice不小心地跌了一跤，很清脆地聽到「咯」一聲，穿高跟鞋扭倒，應該是痛苦的事，雖然作為男人，我絕不明白，但見她痛苦的樣子，都知道是「女人的痛」。

我：阿Jan，有冇事啊？(我立刻扶起她。)

Janice：應該係扭親下啫！(她面有難色。)

我：痛唔痛啊？

Janice：有少少！

我：唔好啦！我送你返屋企先啦，唔好再行街住啦！我打比小S先！

小S：你地係邊啊？

我：小S，阿Jan扭親啊！

小S：有冇事啊？

我：應該係普通扭倒啫！我都係送阿Jan番屋企先啦！

小S：好啦！你快啲送啦！我地Ok嫁啦！

我扶著阿Jan走到地鐵站，幸好有座位，可讓她休息一下。到了杏花村，我們下了車，但見著阿Jan還是痛苦的樣子，總令人不太放心。

Janice：你送到我依度得啦！

我：但係你屋企遠唔遠嫁？

Janice：嗯.....我應該Ok嫁！

我：唔好啦，一係等我揸你啦！

Janice：咁樣唔係太好既！（她似乎很尷尬。）

我：趁依加冇咩人應該唔會有熟人見到既！

Janice：咁.....就麻煩你啦！

我：你指去邊個方向，我就行邊一邊啦！

Janice：嗯.....

Janice：我.....係咪好重啊？

我：唔係啊，還可以吖！

Janice一點兒都不重，甚至比小S還輕，但是經過長時間的疊加下，負重始終會增加。剛開始時，阿Jan比較生硬，但漸漸放鬆後，就緊扶我的肩膀。

我：阿Jan，其實你.....駛唔駛打番比.....個兩個男仔交代下你點啊？

Janice：嗯.....其實.....我同佢地係普通朋友，所以.....

我：但係.....佢地對你有.....意思嗎！

Janice：佢地好好，不過.....唔係太適合我.....

我：我太八卦添！

Janice：唔緊要！都唔係咩特別事！

行了十五分鐘，終於到Janice家了。

Janice：得嫁啦！唔該晒你！阻到你除夕日子既興致真係唔好意思！

我：冇緊要啦！最緊要你冇整親！屋企有冇藥油啊？

Janice：係木櫃筒第二格！

我：你除咗絲襪先啦，我幫你搽完藥油先走。

Janice：下.....咁.....會唔會阻到你？

我：好快嫁啫！反正都送到你返屋企啦！

Janice：咁就勞煩.....你.....啦！

在這裡，我不詳述如何替人搽藥油了，因為若果你們是喜歡長腿的朋友，都知道這種感覺是別有一番滋味在心頭，只是純欣賞角度，不用胡亂猜想與FF，我不是變態的！

不過在搽藥油期間，我感覺到阿Jan目不轉睛地盯著我，她的眸子泛起一個又一個的光波，難道是被我弄很痛？

與小S通電話交代.....

小S：阿Jan點啊？有冇事啊？

我：得啦，佢冇事啊，返咗屋企啦，唔駛咁擔心啦！

小S：咁就好啦！

我：你都早啲返屋企啦，我唔想成為你第二個整親啊！

小S：Ok！

我：我眼訓啦！返屋企啦！Bye！

小S：Bye Bye！

一月，大家都忙於考試，二月又因為拜年，大家絕少見面。到了三月，我卻做了一件浪漫的事情。晚上，我接過一個來電。

小S：有部戲我好想睇啊？

我：咩戲啊？我唔會睇《吸血新世紀》嫁！悶到發溫！

小S：唔係啊！係《Beastly》啊！

我：《美女與野獸 - 新世紀激情篇》？

小S：係啊！星期六，五點鐘Ok嗎？

我：唔得啊！

小S：下！點解啊？

我：近排有野做緊！

小S：咁我自己睇啦.....

看來這個場面很悲傷，但我將它完全扭轉。早在星期六，我已經早到了戲院一小時，只等待小S買戲票，然後我進去給驚喜。事情發展尚算順利，她買戲票後，就去了洗手間，我就買下旁邊的一張戲票。待她進場後，我從後跟上，她坐下，我逐漸走近。

我：小姐，介唔介意坐你隔離？

小S：.....可以啊！（她碌大了眼睛，看著我，笑逐顏開的面容展露無遺。）

小S：點解你又突然出現既？（她突然摑著我的手。）

我：依個係秘密！完成一幅畫係需要一個好重要既元素。小姐，願唔願意永遠成為我畫中既風景啊？

小S：嗯.....我願意！

其實一般來說，我認為這些是無聊事，但我知道對小S來說，卻是一件浪漫和刻骨銘心的事情，所以為她做一兩次，我從不介意。人生有驚喜，是生活上必然的調味品，更何況是她這個人呢！

小S：教你講句法文吖？

我：你識咩？

小S：法文係我一半母語黎嫁！

小S：跟我讀 Je t'aime

我：咩黎嫁？

小S：跟我讀啦！

我：好啦！Je t'aime！

小S：你唔準同第二個人講嫁！係"我愛你"咁解！

我：你咁唔知醜既，迫人同你講！

小S：你唔鍾意我？

我：唔知呢！你估下！

小S：無論你愛唔愛我都好啦！多謝你陪我睇戲，Dennis！

我：去食飯啦，傻瓜！

七月二日，這是一個凝重的日子，我來到小S家。發現Ashley, Katherine, 小S神色凝重，見著她們的手拍在Janice的肩膀。原來Janice正在飲泣，淚雨俱下，散落在人間。我有點驚訝，用手打量小S。

我：阿Jan做咩事啊？

小S：唔知啊，佢黎到就係咁喊啦！

我：.....

小S：佢好似話佢做咗啲好唔啱既事，原諒唔到自己！你都幫手氹下佢吖！（她嘆一口氣！）

我：好既！

一會兒後，Janice開始冷靜下來，但淚水仍然含在眼眶。

我：阿Jan，總有人會諒解你嫁！

Janice：嗯.....(眼淚又來了！)

仍然未知道Janice發生何事.....我心裡突然出現一個奇怪的疑問.....或許是我想太多吧.....

中五學期完成，我與小S仍然繼續扮演潛伏在黑幕中的情侶.....

暑假前夕七人行

暑假前夕，我們七人就到長洲度假屋住三日兩夜。其實，度假屋之旅本應是我與家人每年的節目，但因為家人都忙於工作，尤其是手執鑰匙的舅父，所以今年決定取消。既然大家都未能抽空，我就決定向舅父借鑰匙，免得失去度假享受的機會。

七月的天氣非常炎熱，地面像燒紅的鐵鑊，熱氣慢慢地蒸上來。我們到了度假屋，放下行李，體力已消耗一大半了。古語有云，不是！不是！是俗語說：「夏日炎炎正好眠」我正想睡著的時候，小S就衝過來拍一拍我。

小S：喂啊！咪訓啦！

我：咩事啊？

小S：我地行下長洲啦！

我：嘩！你睇唔到個太陽熱到燒死人咩！你唔驚曬到有雀斑咩？

小S：一早搽咗防曬啦！

我：你搵阿Jan陪你啦！

小S：唔得啊！阿Jan睇完本書之後要打機啊！Ashley佢地又訓著咗！

我：咁仲好啦，你陪佢打囉！

小S：你知我都唔識打機既！何況都有Matthew同Patrick啦！

我：比一個鐘我訓下先，等個太陽冇咁熱先啦下！

小S：我等你啊！一個鐘後叫醒你！（迷人的單眼加強了我的睡意！）

我：（最好唔好叫啦！）

果然小S真是有早沒遲，給我剛剛好一小時。唯有硬著頭皮出去吧！在這裡就介紹一下長洲美食，因為小S跟我逛街不外乎「食食食」。長洲，以我角度有「三絕」。第一是砵仔糕，因為香甜，質感結實且多紅豆。若果大家到長洲，就嚐嚐吧！第二是糯米滋，有芒果、紅豆、花生、芝麻，各有風味。第三是本人的母親大人摯愛，就是粽子，的確美味，但我認為價錢不合理！大家都可以嚐嚐！

黃昏前，我們二人就手拖手慢步海邊，手執一串冰糖葫蘆，就這樣地消耗餘下的一半體力.....

小S：今日我真係好開心啊！咁走行咗成日啦.....

（她偎依著我，把手臂扣得緊緊的，沒有想放手的意欲。）

我：累唔累啊？

小S：唔累啊！因為有你.....陪我(她搖搖頭.....)

我：我地睇多陣日落就番去啦！好唔好？

小S：噃！噃！

一會兒，我們收到電話，他們約在長洲街市買BBQ材料。由於合七人之力仍是太薄弱了。汽水是不夠的，所以要再次往超級市場。我當時已經累透了，實在不想再去，但基於公平原則，所以以「包剪掙」方式決定二人買汽水。

七人：包剪掙！

(人人皆出剪，只有我跟阿Jan出包！)

我：咩料啊！又要我落！

Ashley：哎喲！

Katherine：哈哈！

小S：(掩嘴笑.....)

Janice：(呆.....)

Matthew, Patrick：Oh！

我：你地夾埋嫁！

小S：一係我陪你地去吖！

Ashley：唔得！願賭服輸！你同阿Jan拿拿臨去啦！咁就啱啦！Matthew佢地去透火，我就等食！

我：至勁係你地啦！

我跟阿Jan一起走到超級市場買汽水，剛見對面有售賣麥芽糖夾餅的小檔口。

我：阿Jan，有冇興趣啊？(我指向檔口！)

Janice：有啊！

我：唔該兩塊夾餅吖！

婆婆：唔好意思啊！已經賣晒啦！

我：咁算啦！唔該你！

婆婆：其實我仲有半樽麥芽糖，餅就冇啦！我送比你同女朋友擺返去食啦！

Janice：(面孔像溫室蘋果，看起來很香甜味美！)

我：婆婆，你誤會啦！佢唔係我女朋友，我邊度有咁好福份啊！

婆婆：點都好啦，你揸住啦！

我：咁多謝你啦！

我：個婆婆亂咁講嫁渣，你唔介意嗎？

Janice：嗯.....我地.....都係快啲返去啦！

入屋後，我們闖進廚房，手執木筷子，品嚐麥芽糖夾餅。

Ashley：你地係度做緊咩？

我, Janice：(轉身)

Ashley：哦！你地係度偷食(偷腥)！仲食得咁滋味！

Matthew, Patrick：Bomb Bomb Bomb

小S：.....

Katherine：(掩口)

我：麥芽糖夾餅渣嗎！

小S：(鬆口氣)

Janice：(繼續咀嚼)

Ashley：咁獨食嫁！

Katherine：Ashley，你咁大聲做咩啊！大驚小怪！一齊落去燒野食啦！(打了Ashley的頭)

我們逐漸離開，小S的神態有點怪異，我就找她談談.....

我：做咩啊？唔開心？

小S：(一言不發)

我：你以為我同阿Jan偷食呀(偷腥)？

小S：咁.....阿Jan咁好，又清秀，有邊個唔想食吖！係既話我會祝福你地嫁.....

我：傻瓜！冇你咁好氣，見到你就飽晒啦，唔駛偷食啦.....

小S：你又擺我黎講笑！都係去燒野食啦.....

BBQ完後，到了集體遊戲時間，就是我不太喜歡的Truth or Dare。幸好多次都沒轉中我，只是聽Ashley, Matthew, Patrick等人「自爆」，大致上是十分平淡，即使是Dare，也是唱唱歌等。我中途離場，洗澡去了，盡早睡覺，不夠十分鐘，他們解散，我抹著頭，經過房門，偷看到Janice和Matthew二人。小S從後拍我一下，我們二人面貼面地望進房間。

小S：有咩睇啊，小Den？

我：(指一指)

Matthew：我好鍾意你啊，阿Jan！可唔可以同我一齊啊？(場面十分震撼，感覺到Matthew的勇氣是由心而發！)

我：嘩嘩嘩！好主動！

小S：好勇敢啊！

Janice：對唔住啊！我地只係朋友，我有意中人嫁啦！多謝你既好意！

Matthew：我會等你嫁！

Janice：(轉身離開)

我：快啲走啊！阿Jan黎緊！

小S：嗯嗯！

我：阿Jan原來有意中人嫁？

小S：我唔係太清楚啊！阿Jan眼光應該唔錯！

我：不過Matthew都幾好吖！

小S：都係既！

我：小S，唔知道你眼光又點呢？

小S：我.....我.....去訓.....教啦！（她面紅耳赤地急步走，非常可愛。）

翌日早上，因為不習慣陌生床的我，在日出前剛醒了，靜待了十五分鐘，太陽漸漸嶄露頭角。小S正在甜睡，免得吵醒她了。這時，我望出窗外，看見阿Jan從屋裡走出來，當時晨曦照到遍地金黃，在她的頭髮不留痕且悄悄地略過，我頓時面紅耳赤，因為這一幕很美，我不禁掏出照相機拍下這一幕。

我從一樓走到大廳，繼而踏出屋外，正當我想呼叫阿Jan的時候，她轉身向我莞爾微笑，舉起一根手指放在嘴唇邊，然後閉上眼，放第二隻在耳邊，示意不用說什麼，只需要聽海濤聲，觀賞瞬間的美景。我點點頭，足足享受這遍人間仙境約十五分鐘，她拍拍她的連身裙，就微笑地進了屋內.....

第二天總括來說沒發生特別事，就是這樣，我們七人就度過三日兩夜了.....

痛在剎那間釋放

在中六暑假，我跟Tyler去了交流團，所以基本上我與小S她們根本上是零接觸。後來，暑假末段又要準備中學文憑試(DSE)，已經沒有時間聚會了。我向Tyler講述有關小S的事情，他也是個不錯的傾訴對象來的，我一路而來十分感謝他的幫忙。

中六生涯不外乎補習、複習和溫習，很枯燥乏味。我的那間中學多得校長的「德政」，要合乎中六並且嚴守綱紀才能外出吃飯。雖然我在學校會議提出幾次動議，但實在太可惜，被多次否決。只好踏上中六才吃一餐安樂茶飯，捨棄校內的「垃圾飯」。

平日我總是外賣回來吃的，有時會連群結隊用膳。但今天我實在冒了一額冷汗，我迫於無奈地欺騙同學，自己偷偷地外出吃飯。因為我從窗外看到小S站在校門，當時的我唯有不慌不忙地說了一個合理的謊話，就衝出校門。為免惹來麻煩，我一手抓著小S的手，向她示意奔跑，她一臉不解就跟著跑。她還穿著高跟鞋，委屈她了。最後，我們跑至商場內的西餐廳。

小S：做咩咁急跑既？

我：係呀！因.....為.....時間太少，想見多你幾眼！（我喘著氣！）

小S：嗯.....係咩！人地本來想比驚喜你添，點知你一手就捉住我啦！

我：無所謂啦！叫野食先！

小S：好啊！

小S：我幫落糖咩！

我：唔該你！你仲記得我口味？

小S：係呀！

沒想到連小小的習慣，小S都一一記得，的確十分窩心。回到學校，Tyler問我，為什麼跑得這麼快，我輕輕回答就算了，以免節外生枝吧！

在上學Last

Day當天，我們一大班人連同班主任去了吃晚飯。途中，班主任大讚班上一位女同學的賢良淑德，我竟然受這些言語迷惑，以為自己愛上她。到頭來，原來幻覺多過事實。不過，身為一位中學生有多些幻覺，都是好事。因為在中學生涯中，絕對要尋找生命中的留白，否則會後悔一生。年華老去時回首一下，就知道可貴之處何在了。

今年，學校提早了Study

Leave，約一月中已經放假，我亦要籌備DSE了。二月十四日是情人節，亦是大年初一，小S約了我去看電影。當天，我實在太累了，不小心地睡著，但是小S與平時不同，今天的她向我踩了一記高跟鞋，可能是怒我在戲院睡著吧！不過，我很少見她這樣，唯有考完DSE後再找她解釋一下吧！

DSE是長期戰爭，可叫做中學生涯的最後之戰，打完這場戰爭後，我跟小S她們又聚了一聚。今天，說起的話題可算是掀起我心裡的疑問.....

Ashley：今日，有個男仔送咗朵金花比Stephanie啊！

Janice：(一言不發)

Katherine：(望向Ashley皺眉)

小S：我.....啊！

我：(眺向小S！)

究竟我有沒有介意過有人送金花給小S呢？我答不出，但不多不少有點兒不喜歡。但我們從來都沒有表明關係，根本不算是什麼情侶，為何不快呢？或許是我太過著緊她，所以有一種難以解釋的愛。

她們走後，剩下我和小S.....

我：朵金花幾靚啊，好有心思！

小S：我同個男仔冇關係嫁.....冇關係嫁.....

我：其實你冇必要同我解釋嫁！

小S：唔得啊，我要講清楚啊！我唔想你誤會啊！

我：嗯.....

小S：仲有三個月我要走啦，聽埋我最後解釋啦！我以後都唔會番黎嫁啦！

我：下！

小S：.....(已被哭聲掩蓋.....)

我當時很錯愕，就像小S請求我與她同住一樣，不同的是有一剎那的心酸，如刀割一般。她說的走是什麼意思？我不敢去想，亦不想去想，因為我認為這個答案完全沒有意義。相信大家都會明白，離別是人生必經的事，不能去強求什麼，但在於我們的關係上，我有十萬個捨不得的理由。

突然小S衝進自己的房間，鎖上房門，雖然我在門後，但見到的卻是一道緊閉的牆壁。我的眼淚自然地奪眶而出，聲音變得沙啞，回想起痛苦的經歷。

我：小S，開門啦！小S，開門啦！

小S：你比我靜一靜吖！比我好過啲！（她嚎啕大哭！）

我就這樣離開了，周遭空氣充斥心酸的感覺，使人難以呼吸，我還未接受這個不爭的事實，我只想保持這種親密關係，永遠做她背後的男人。

這幾天很靜，感覺總是力不從心，連做事也提不起勁，不知小S現在做什麼呢？她已經沒找我許多天了，有沒有因為空虛寂寞而痛哭呢？我通通都想知道，可惜無論在言語、行動上，她都故意避開我。這時，收到阿Jan的訊息，約我見面。

Janice：你知道咗小S要走既事拿？

我：係啊！

Janice：依兩日佢都係時代廣場同太古城溜冰場呆坐，如果可以既話，你去睇下佢吖！我知道佢好需要你嫁！（她眼泛淚光.....）

我：阿Jan，好多謝你！

當天，我亦找了Tyler傾訴心事，我倆互相傾訴各自的感情煩惱。他說兼職中認識的女孩和一位在交團的女生，我卻說小S即將離開的事實，明顯地我們兩人都心煩意亂。

Tyler：你就好啦！有個對你咁好又咁癡情既小S.....

我：嗯！我的確幾好彩.....

Tyler：你仲唔去搵番人，等運到咩？

我：嘩！你夠係啦！有口話人，冇口話自己！你又唔搵？

Tyler：唉！唔好提啦！好煩！

我：唉！小S佢應該都唔想見我！搵又有咩用啊？

Tyler：既然佢都就走，你比啲開心既回憶人啦！

我：我知點做啦.....(我一定會找到她！)

兩天後，我來到她呆坐的目的地。我在小S背後觀察，她已經呆坐在溜冰場足足兩小時，絲毫不動。突然，她在沒帶任何雨具情況之下，走出街外。這時，我知道我應該找她了。我撐著一把雨傘，走到她的身旁，她神情哀傷，面容憔悴，雙眼紅腫地看著我，跟我煮早餐的情景一模一樣。我實在很難說出任何東西，只能強忍淚水.....

我：叻啦，快啲返屋企啦！

小S：點解吖！點解吖！點解你又突然出現搵我啊！點解要對我咁好啊！唔好對我咁好啊！

我：唔好喊啦，返屋企啦，會淋病嫁啦！

我們兩人步行回家，但她情緒仍然不穩，一呼一吸都連帶著哭泣聲。她躺在床上，可能太疲憊的關係，很快睡著。我隱約地聽到她說，「不要走」三隻字，我的心痛如傷口撕裂一樣。我有回想過，我認識她是不是一個嚴重的錯誤，若果我沒有誤闖她的圈子，結局又會是怎樣呢？約兩小時後，小S醒了。
.....

我：有咩想食、想睇？

小S：食咩睇咩都唔重要，只要你願意係我喊既時候，借膊頭比我就夠啦！應承我陪我走過最後一程咩？

我：好啊！我地係依度過埋開心既日子啦，唔好再避我啦，我好擔心！

在這個暑假，我倆形影不離，一起度過餘下的時光。小S向我交代出國詳情，原來她去法國，跟外婆住一年後，打後日子就跟隨父母。今天，她相約我餐廳吃晚飯，我們雙雙走進餐廳，在一對夫婦面前坐下，我感到疑惑不解。

小S：Daddy媽咪，依位係Dennis啊！

我：A.....un.....tie.....Uncle你好！（打一個短訊給小S，點解唔同我講聲！）

小S：（係驚喜啊！）

Auntie：你好啊！我聽堂姐講，你幫我照顧Stephanie好多，真係唔該你！

我：邊係呢，太客氣！

小S：你地慢慢傾啦！我失陪一振！

Auntie：可能我太突然，我想問下你知唔知Stephanie點解心事重重啊？我見佢唔想離開香港咁，我問過Janice佢地，佢地都唔知。

我：我都唔係太清楚啊，可能係唔捨得Janice一班朋友掛.....

Auntie：咁介唔介意幫我開解下佢，又或者.....支持下佢去外國啊？我諗得你同Janice可以幫到我。

我：咁我.....盡量啦.....

食過晚飯，我跟小S慢步大街小巷，街道上夜闌人靜，只剩下我倆的影子，互相交錯重疊，形成巨大的連理枝。我神色凝重，一路想著伯母說話的含意，為著小S的生活，我應該勸她離開，但是這些說話又怎能開口，心裡突然滲透一種莫名的忐忑。

小S：你地傾啲咩黎啊？你同我媽咪咁好傾既。

我：哦！唔係咩既，閑話家常啫！

小S：我諗佢地一定好欣賞你啫！

我：唔會掛，我都有咩優點既！

小S：我睇到好多好多啊！不如我留係香港好唔好啊？我去法國之後，返黎香港吖？

我：(突然一問，確是好難回答，我亦未準備好！)

我：哎呀！成十二點啦！太夜啦，你要快啲返屋企啊！你好耐冇見屋企人，都係快啲陪下佢地啦！

小S：好啦，咁我地聽日再見啦！Bye Bye！

經我反覆思量，我仍未決定怎樣說服她離開香港，甚至是使她忘記這裡的一事一物。無論如何，為了她的幸福，我都應該對她狠心一次，收起留下她的自私，她應該會明白的。

小S：我今日有好多好多地方好想去啊！

我：等一等先，我要講一講啲野！

小S：做咩啊？

我：如果你可以留係香港，我當然好開心！但係你唔應該屬於依度，你有你既屋企人，佢地係你最親密既人，所以你安心咁離開依度啦，不好留戀。繼續找尋你既幸福.....

小S：點解吖，點解吖？你地一個二個都係咁，你又係，阿Jan又係，我最唔希望你地講依啲說話，你地就偏要講！點解唔可以比我好過啲.....

我：應承我啦！你好後生，仲有好多幸福.....

小S：我唔會應承你嫁，我咩都有聽過啊！

雖然我預知到結果如此，但我從不後悔，因為我所說的話都是為她著想，我會相信總有一天，她會明白我與阿Jan好意。愛不只是強求一起的自私，而是能夠目睹她漸行漸遠的勇氣。

當天晚上，我收到小S的電話，或許她終於明白我了.....

小S：今朝早好對唔住，我唔應該發你脾氣！

我：唔緊要啦！

小S：我應承你啦！多謝你凡事都為我著想！屋企人都應該係我最重要既野！

我：你明白就夠啦！

小S：我去完法國之後，就會跟番屋企人，應該都唔會有機會番黎啦！我到咗法國之後，可唔可以打比你，聽下你把聲啊？我打完一次就夠啦！

我：嗯！假若你返黎香港，都可以打比我，我今生今世都唔會轉電話，隨時搵我！

小S：我執野先啦，我都要送Daddy媽咪機啦，再見！

我：嗯，Bye Bye！

這幾天，我沒有好好地睡，或許我很念掛小S，不知道她離開我後，會吃得飽？會穿得暖？會睡得好？逛街的時候，我將她的手握得異常地緊，留戀她的香氣，凝望著她最美的側面。我才知道心裡的翻騰掙扎，就像熾熱的岩漿，很難受。

小S：望住我！

我：唔好啦！

小S：比我望多你幾眼啦！

我：我望你既時候，個心會好痛！

小S：比我望啦！你都要望下！記住我啲眼、耳、口、鼻、輪廓！

我：不如忘記仲好啦.....

小S：你聽住啊！你要連口味、習慣、品味都要記住！

我：小S.....

小S：記住啊！即使你唔記得我，你係我個心都有位置，即使我地以後唔會見，但你都要.....記住依幾年黎既日子.....

我：夠啦！我地行埋餘下既路啦！

我們五人來到機場，大家沒說了什麼，只是默默地等待時間過去。大家的心情實在難以形容，百感交集，說一句話也像搬一塊沉重的石頭。小S突然說了一句，大家只能強顏歡笑。

小S：你地笑下啦！比我睇清楚你地吖！

Ashley：小S啊.....

Katherine：.....

Janice：(閉上了眼睛.....)

Ashley：你走咗邊個送我機啊？

小S：有Katherine同Janice.....

Katherine：咁我呢？

小S：有Janice.....

Janice：咁我點呀？

她們相擁而哭，歡送這段美麗的友誼，場面是落幕下的夕陽，是這麼動人。

小S：有野送比你！（她緊握著我的手！）

我：係咩啊？

小S：係第四十三份甜品，都係第一份甜品，亦係最後一份！你同阿Jan去我屋企慢慢品嚐呀！

我：好.....啊！

小S：咁再見啦！記住我容貌，記住我每次整比你既蛋糕，記住我講唔出口既愛！我愛你，Dennis！

(她的深情擁抱在心裡的琴弦上勾勒出無盡的音符.....)

我：我會記得妳！

小S：(點點頭)

第一次 我說我會記得妳.....

目睹小S離去後，Ashley和Katherine在機場上徘徊不走，我跟Janice乘巴士回小S的家。我倆見桌上的檸檬批，我在撿起一張字條。

<http://www.youtube.com/watch?v=mZPjyWPYP7s> 《Drenched – 曲婉婷》

三年前，我們透過奇怪的偶遇而結識，當時我看到的，是一位喜歡吃蛋糕的小朋友。當年正值是父母公幹的開始，獨自生活。因為你，我能夠有特別的喜悅，不再感到孤單寂寞！

還記得桌上的檸檬批嗎？是你最欣賞的甜品，你說是世界上最簡單的美味。今早才剛剛烤起的，你嚐嚐，有沒有那份久違的味道？記得要跟阿Jan分享啊！

你跟我住在一起的兩星期，永遠是最難忘，因為我看到體貼的你，我看到溫柔的你，我看到感性的你。

我知道你跟阿Jan的說話都是為我著想，我收到你們的好意。雖然我想你告訴我「不要走」，但你用了這個方式告訴我，我也感到前所未有的感動。原諒我當時故意迴避你的那份幼稚.....

我還是、真的喜歡你！

我當時跟Janice相擁而哭，出現第一次的淚眼婆娑！

人生總是無止境的重覆，痛還有第二次.....

善良溫柔與歉疚

這幾天，我對小S仍然是念念不忘！隨著這一個月，Ashley, Katherine亦相繼離開，只剩下Janice。作為Janice的好知己，我亦願意陪她走最後一程，但今天的事卻亂了我的思緒。

Janice：我地食下午茶吖！

我：好啊！係邊度等啊？

Janice：你黎一黎琴行吖？順便還野比你！

我：還野比我？

Janice：係啊！

我：阿Jan，我黎咗啦！

Janice：噃！你坐低吖！

我：噃！

Janice：上次我仲差你一首歌，依加還比你啊！

我：咁我靜心咁聽啦！

Janice：唱得唔好，唔準笑人嫁！

我：Ok！

<http://www.youtube.com/watch?v=6xGRSu6yYY8> 《太陽之歌----澤尻英龍華》

阿Jan將這首歌演繹得有原唱者的影子，想不到她也有看過這部劇集，這劇集是使人傷感的，與《一公升眼淚》差不多。我也聽得如癡如醉，她的歌聲使人十分舒暢，就像破曉而出的太陽般溫柔。

我：好好聽啊！（我呆了幾秒！）

Janice：多謝！

我：你有睇《太陽之歌》？

Janice：係啊！

我：幾有品味！

Janice：個時聽到首歌決定學彈！

我：首歌幾襯你！

Janice：Thank you！肚餓啦，去食野囉！

在餐廳裡，我們面對而坐.....

Janice：我幫你加糖吖！（兩茶匙糖唔攪）

我：哦！唔該你！（這個畫面實在似曾相識！）

回到家中，我收到阿Jan的短訊，當時已是深夜，月色朦朧且帶迷茫。

Janice：識咗就黎三年啦可？

我：啲陳年舊事提黎做咩啊！

Janice：仲記唔記得第一次相識既時候？

我：記得既！當時你有啲Cool，幾靚，小S話你係佢最好既姊妹！

Janice：嗯嗯！年底我就會走，我有個問題好想問你？

我：做咩咁嚴肅，你問啦！

Janice：我走咗你會唔會好傷心吖？

我：當然會啦！你地JASK個個都係我既好朋友，邊個走我都傷心！

Janice：其實我意思係會唔會好似小S走個振咁傷心？

我：阿Jan，係咪發生咩事啊？

Janice：會唔會啊？你會喊嗎？

我：唔知啊.....

Janice：當日去送機，我喊唔只係因為小S，一部分係因為你啊！

我：阿Jan.....你.....

Janice：我知你地一齊過，但你地若即若離，我好痛！

我：都過咗去啦，唔好提啦.....

Janice：自從除夕夜個一次，我就好喜歡你啦，加上係圖書館.....

我：阿Jan，依啲事唔駛掛係心度.....

Janice：我知道小S好喜歡你，你地好似黑幕情侶咁，我.....

我：好多野整定，所以.....你做番原先阿Jan，我好難面對你.....

Janice：嗯嗯.....我想約你，約你幾年後係圖書館見你.....

我：雖然唔知到時係點，但係我會應約的！Keep Your Cool Smile！

Janice：約定你！

當晚，我失眠了，久久不能入睡，因為我猜不透我跟阿Jan的距離。我們有共同嗜好、性格、口味，一直當她是一位好知己，沒有半點聯想到愛情。

我不得不承認，有一位跟自己相似的戀人，是一種幸福。只可惜，時間不對。或許早些遇到阿Jan，我們會有幸福，成為一對戀人。

我左思右想，都解不清答案，我對她不是零感覺，但時間出錯，關係錯雜，就形成這個問題。最終，整晚沒睡，就捱病了。

足足一星期了，病亦未痊癒，今天吃飯時，我見到阿Jan一臉擔心的臉容，不斷詢問我的病情。我知道她很想跟我說清楚，但無奈是我的精神很差，她很溫柔體貼，沒有向我說什麼，很理解別人的感受。在車上，我太累了，我倚靠她的肩膀睡著了.....晚上，她打來問候我了，她對我愈關心，我就愈難堪.....

Janice：你有冇事啊？

我：我Ok啊！

Janice：對唔住啊！我不知道你病咗.....

我：冇緊要！應該係我講唔好意思，頭先係車上面.....

Janice：無所謂啊！我知你好叻，先唔叫你！

我：去演唱會個日，我好似唔係太得閒，所以我可能陪唔到你啊！

Janice：下，你係唔係討厭我啊？

我：唔係呀，唔係呀！係你太好啦.....其實你人又好，又靚，唱歌又好聽，你一定搵到好男仔.....

Janice：我知我有追求者，但係我掛住既係你.....

我：阿Jan.....

Janice：係我臨走前陪我多啲吖！求下你！求下你！小小就夠啦！

我：嗯！

Janice：咁我唔阻你啦，早啲休息啦！

緊接下來的二十分鐘，我收到一個沒有來電顯示的電話。

我：喂？

小S：小Den！（她親切依然.....）

我：你到咗拿，Stephanie！

小S：係啊！我到咗就即刻打比你啦，好掛住你啊！

我：一切安好就夠啦！

小S：個檸檬批好唔好食啊？有冇當年既味道？

我：有啊！仲係當時既味道！

小S：你睇咗張紙條？

我：嗯嗯！

小S：好多謝你依幾年陪我！每次諗起我都好窩心！

我：我都係咁覺得！

(由頭說起)

小S：應該剩番阿Jan渣，可唔可以代我陪下佢啊？

我：佢.....嗯嗯.....可以啊！

小S：拜託你啦，我最愛既男人！時候唔早啦，唔知幾時可以再見，我.....！

我：唔好講啦！我記得你，一位甜品女孩！

小S：我都記得你，一位溫柔體貼既男人！

經過短短二十分鐘的對話，我的確釋懷了許多，心裡又突然想起阿Jan，因為我答應了小S？

一個月後，我跟阿Jan通電話，由於我實在難以去將整段對話發佈出來，所以大概地節錄。

Janice：自從除夕個次，我已經喜歡你，但我知小S都好喜歡，所以我冇講。我唔想小S唔開心啊，因為佢經常都係自己一個，無人會知佢幾難受！係中五個振，我終於係佢地面前喊咗出黎.....你同我講個句，我好記得.....小S避你，你二話不說搵佢，你攞住佢個一幕，我望到啊！好令人心碎！

我：好多謝你既錯愛，係我唔好！

Janice：唔係錯愛，我願意.....痛一個人就夠，唔需要三個人.....

我：對唔住，阿Jan！

Janice：唔緊要嫁！唔緊要嫁！我知自己冇小S咁叻，又唔識整甜品.....你唔鍾意我都係應份.....

我：唔係啊！你真係我見過最善良既女仔，係天使，好討人喜歡.....仲處處為人設想.....好感動.....

Janice：嗯嗯！

我：咁不如我地.....一齊.....

Janice：唔好啊！你唔一定比任何野我嫁！被我同你相處下，撒下你嬌，我就滿足嫁啦！

我：你係唔係介意我同小S既關係啊？

Janice：冇啊.....我.....冇資.....格去介.....意.....我唔想.....令佢難做.....

我：對唔住.....我彌補唔到你創傷.....

Janice：你唔好咁講啦！我講咗我心聲就夠啦.....無論做咩，我都唔介意嫁.....

我：好多謝你諒解我啊，阿Jan你令我好舒服！

Janice：Dennis.....

我：嗯.....

Janice：你.....真係好.....好吖！

我：我.....

Janice：多謝你.....

輾輾轉轉，我們終於解決所有問題。我沒有避她，最後跟她去演唱會，因為有一位情深似海的人成全了我！就是一位對阿Jan情深似海男孩的成人之美.....你們猜猜是那一位吧.....

我：搵我有事？

男孩：係！（他遞上演唱會飛！）

我：你.....

男孩：我係好鍾意Janice，鍾意咗佢五年啦！我可以同佢單獨睇演唱會，係好開心！但係佢想陪佢睇既人唔係我，係你.....

我：我.....

男孩：你去啦！我唔想Janice唔開心，只要係佢鍾意，我放棄完全唔介意，幫我比幸福佢.....

我：(接完，他轉身離開)

當她在演唱會中看到我，她笑得很甜，臥蠶包著眼睛上的笑顏.....

Janice：係你！真係你！

我：.....(這情況實在有口難言.....)

Janice：依一刻係我最快樂既時光.....

(她的喜悅表露無遺，但我的滋味卻是苦澀中帶哀傷！)

我：(最偉大最情深似海的男人，你真的好好！)

我只能說阿Jan是一個既心地善良，又體貼的女孩，若果娶到她，必定是男人的福氣.....希望她遇到好人.....

(Whatsapp 對話)

Janice：Dennis！

我：係係係！

Janice：我叫人買咗啲野比你食啊！

我：咩野黎？

Janice：你實好鍾意嫁！

我：係鳳梨酥？

Janice：係啊！你實錫晒我呢？

我：噃噃！咁你呢？

Janice：我食唔食都得啦！

我：我地都係一齊食啦！

Janice：好吖！

阿Jan做每一次事情都很窩心，但我無法掩飾內心歉疚，我在做什麼.....

在最後一星期，我卻知道了一個不應該知道的事實.....

來生再續未了緣

她在收拾東西，準備行李，我打開Janice小時候的相簿，看到一幅相片，頓時驚詫起來，我鼓起勇氣地問。

我：幅相邊度影嫁？

Janice：柴灣公園囉，你好似有屋企人住柴灣嫁！

我：點解無啦啦係柴灣公園影相？

Janice：我未住係杏花村之前，係柴灣同婆婆住嫁！

我：個男仔係？

Janice：個男仔.....聽媽咪講係柴灣公園成日一齊玩嫁！咁啱媽咪幫我影低咗！我仲有少少記憶，個男仔感覺好好，我都幾喜歡，唔知係味我初戀呢？咁細個咁諗，好白痴啊！唔知佢依加點呢？細細個永遠都係最幸福既！

我：我諗佢.....一定好好.....

其實與她合照的，是我本人，但我沒有印象，或許大家的變化太大了，但使人痛心的是，我與她的緣份跨越了一個年代，原來早已相識。雖然我們的相識只有三天，但也可以是緣份的安排。阿Jan就是阿希，阿希就是阿Jan。當時，我沒有說出口，只知道緣份太美麗。

第一次相識是緣份.....

第二次相遇是巧合.....

第三次是命中注定.....

<http://www.youtube.com/watch?v=TC2zIszEXbM> 《時光倒流二十年----陳奕迅》

「早些看著你美麗模樣 對你天真的讚賞」

「童年便相識 餘下日子多閃幾倍光 誰讓我倒流時光一起親身跟你去分享」

每次聽到這幾句，心會很酸，直到現在仍是歷久常新.....

她說完的一剎那，不刻意地轉身，撥弄著豐饒的長髮，加上代表時間和緣份的夕陽，這就是塵世間的簡樸美，不帶一點庸俗。

我仔細想了一想，冥冥中自有主宰？

我與阿Jan早已相識，但我們記不起大家，又因為圈子交錯之下，我認識小S，使感情萌芽，再次遇上阿Jan，重拾這段十年的緣份。

究竟我跟小S相識，是因為要再次遇上阿Jan，抑或是湊巧與小S相愛呢？我無法解答這個問題，只知道我遇上小S不是錯誤，再次遇上阿Jan也不是孽緣，可能愛情就是不分對錯，我們輸給了時間。

如果我沒有遇上當時六歲的阿希，也許心裡會好過些；如果我沒有遇上小S，就不會認識阿Jan；如果如果太多如果，我還可以如果什麼？這位紅顏知己.....要遠去了.....我還能做什麼？

我倆再次來到機場，重演當天的歷史，同樣是充滿離別的悲傷。

Janice：我走啦，我地約定幾年後再見！

我：我會記住你！我會約埋你下一世，唔一定要做情人，可以係朋友，可以係家人，我地來生再續未了緣。阿希！

Janice：你.....

我：係啊！我就係個個男仔啊！我當時唔係唔認你，係我忘記有依件事.....

Janice：十年前係你，十年後又係你.....太遲啦.....如果早啲，我地三個.....

我：天.....意.....弄.....人.....

Janice：咁我地.....係咪.....要十年後先可以再見啊！我地又要重演歷史，然後忘記大家，再次相遇啊？

我：唔駛！所以我約你下一世再續朋友既緣份.....

Janice：好啊！你記.....住提.....我！依一吻我欠咗你十.....年啦，依加還比你！

(一剎那的蜻蜓點水使我心中的湖水出現悸動.....)

Janice：呢幅相送你嫁，你話我著和服著得好好睇.....留係身邊.....

我：放心！我會約定你！再見！

第一次 我說我會記得妳.....

第二次 我說我會約定妳.....

人生就好像一系列的符號，有感嘆，有完結，有停頓，但你從不知道何時會出現，所以你不能錯過任何一刻，但你也要明白人生有遺憾才是完美.....你不得不去接受.....

阿Jan曾留下了刻骨銘心的一句，不知大家如何理解呢？

「我們相遇，然後別離，再恰巧認識，緣份從水中浮現，是不是輸給了時間的證明？」

第三次 我會遇到什麼.....

完~

可能大家會認為故事篇幅太短，畢竟我跟小S和阿Jan兩位不是同一間中學，所以經歷的不是很多。
若果在我有生之年再遇上她們兩位，我再續寫這個故事。
有機會再跟大家分享！
大家也可留言，抒發感受.....